

# Канон Вознесению Господню

*Празднуем через 40 дней после Пасхи*

## *Тропарь, глас 4-й*

Вознёлся еси во славе, Христэ Бóже наш, радость сотворивый учеником обетованием Святаго Духа, извещенным им бывшим благословением, яко Ты еси Сын Бóжий, Избавитель мира.

## КАНОН

Глас 5-й

### *Песнь 1*

*Ирмос:* Спасителю Бóгу в мóри люди немóкрыми ногами наставльшему, и фараона со всео́инством потопльшему, Тому́ Единому поим, яко прославися.

Припев: Сла́ва, Го́споди, свято́му Вознесению́ Твоему́.

Воспойм вси лю́дие, на ра́мех Херувимских вознесшуся со сла́вою Христу́ и спосади́вшему нас одесну́ю Отца́, песнь победную: яко прославися.

Сла́ва, Го́споди, свято́му Вознесению́ Твоему́.

Хода́тая Бóгу и челове́ком Христа́, ли́цы Ангельстии ви́девше с плóтию в вы́шних, удивля́хуся, согласно́ же воспева́ху песнь победну: яко прославися.

*Слава:* Явльшемуся Бóгу на горé Сина́йстей и закóн да́вшему Богови́дцу Моисе́ю, от горы́ Елео́нстей вознесшемуся плóтию, Тому́ вси воспойм: яко прославися.

*И ныне:* Пречи́стая Ма́ти Бóжия, воплоще́ннаго от Тебе́, и от недр Родите́ля не отступльшего Бóга непреста́нно моли́, от вся́каго обстоя́ния спасти́, яже созда́.

### *Песнь 3*

**Ирмос:** Силою Креста Твоего Христе, утверди мое помышление, во еже пети и славити спасительное Твое Вознесение.

Слава, Господи, святому Вознесению Твоему.

Возшел еси Жизнодавче Христе ко Отцу, и вознесл еси род наш Человеколюбче, неизреченным благоутробием Твоим.

Слава, Господи, святому Вознесению Твоему.

Чини Ангельстии, Спасе, человеческое естество видевше совосходящее Тебе, непрестанно удивляеми воспеваху Тя.

Слава, Господи, святому Вознесению Твоему.

Ужасався Ангельстии лица, Христе, зряще Тя с телесем вознесшася, и воспеваху святое Твое Вознесение.

**Слава:** Естество человеческое, Христе, тлением падшее возставил еси, и восходом Твоим вознесл еси, и с Собою нас прославил еси.

**И ныне:** Моли непрестанно, Чистая, происшедшаго от ложесн Твоих, избавитися прелести диаволи, поющим Тя, Матерь Божию.

### *Седален, глас 8-й*

Вслед на облаки небесныя, оставив мир сущим на земли, возшел и сел еси одесную Отца, яко Единосущен Сему Сый и Духу. Аще бо и во плоти явился еси, но непреложен пребыл еси: темже чаеши совершения конец, судити грядый на землю миру всему. Правосуде Господи, пощадь души наша, прегрешений оставление даруя, яко Бог Милостив, рабом Твоим.

### *Песнь 4*

**Ирмос:** Услышах слух силы Креста, яко рай отверзся им, и возопих: слава силе Твоей, Господи.

Слава, Господи, святому Вознесению Твоему.

Вознеслся еси во славе, Ангелов Царю, Утешителя нам от Отца послав. Темже вопием: слава, Христе, Вознесению

Твоему́.

Сла́ва, Го́споди, свято́му Вознесéнию Твоему́.

Яко взы́де Спас ко Отцу́ с плóтию, удивíшася Ему́ Ангельская во́инства, и возопíша: сла́ва, Христé, Вознесéнию Твоему́.

*Слава:* Ангельския сýлы гóрнейшим вопи́яху: врата́ возмите Христу́ нашему́ Царю́, Егóже воспева́ем вку́пе со Отце́м и Ду́хом.

*И ныне:* Де́ва роди́, и ма́терняя не позна́: но Ма́ти у́бо есть, Де́вою же пребы́сть, Ю́же воспева́юще, ра́дуйся Богоро́дице, взыва́ем.

### *Песнь 5*

*Ирмос:* Утреннююще вопи́ем Ти, Го́споди, спаси́ ны: Ты бо еси́ Бог наш, ра́зве бо Тебе́ ино́го не зна́ем.

Сла́ва, Го́споди, свято́му Вознесéнию Твоему́.

Испóлнив весéлия вся́ческая, Мíлостиве, к гóрним сýлам с плóтию пришéл еси́.

Сла́ва, Го́споди, свято́му Вознесéнию Твоему́.

Ангельския сýлы взéмлема Тебе́ ви́девше, врата́, взыва́ху Царю́ нашему́, возмите.

*Слава:* Апóстоли ви́девше возвыша́ема Спа́са, с трéпетом взыва́ху Царю́ нашему́: сла́ва Тебе́.

*И ныне:* Де́ву по рожде́ствé поём Тя, Богоро́дице, Ты бо Бо́га Сло́ва плóтию мýрови родила́ еси́.

### *Песнь 6*

*Ирмос:* Обы́де мя бéдна, гроб мне кит бы́сть, аз же возопíх к Тебе́ Человеколю́бцу, и спасé мя десни́ца Твоя́, Го́споди.

Сла́ва, Го́споди, свято́му Вознесéнию Твоему́.

Взыгра́шася апóстоли, зря́ще на высоту́ днесь Зижди́теля взéмлема, упова́нием Ду́ха, и стра́хом зовя́ху: сла́ва восхо́ду Твоему́.

Сла́ва, Го́споди, свято́му Вознесéнию Твоему́.

Предста́ша А́нгели, вопи́юще Христé ученико́м Твои́м: и́мже о́бразом ви́десте Христа́ восходя́ща с плóтию, па́ки

приидет Праведный всех Судия.

*Слава:* Яко видеша Тя Спасе наш небесныя силы, на высоту вземлема с телом, взываху, глаголюще: велико Владыко, человеколюбие Твое.

*И ныне:* Купину Тя неопалимую, и гору, и лествицу одушевленную, и дверь небесную достойно славим, Марие славная, православных похвало.

Господи, помилуй. (*Трижды.*) Слава и ныне.

### *Кондак, глас 6-й*

Еже о нас исполнив смотрение, и яже на земли соединив небесным, вознесся еси во славе, Христе Боже наш, никакоже отлучаяся, но пребывая неотступный, и вопия любящим Тя: Аз есмь с вами, и никтоже на вы.

### *Икос*

Яже земли на земли оставивши, яже пепельныя персти уступающие, приидите воспрянем, и на высоту возведем очи и мысли, вперим виды, вкупе и чувства, на небесная врата, смертнии, нещумим быти в масличней горе, и взирати на Избавляющаго на облацех носима. Отонуду же бо Господь на небеса востече, и тамо даролюбезны дары раздая апостолом Своим, утешив я яко Отец, и утвердих я, наставив яко сынов, и рече к ним: не разлучаюся вас, Аз есмь с вами, и никтоже на вы.

### *Песнь 7*

*Ирмос:* В пещи огненной песнословцы спасый отроки, благословен Бог отец наших.

Слава, Господи, святому Вознесению Твоему.

На облацех света вознесыйся, и спасый мир, благословен Бог отец наших.

Слава, Господи, святому Вознесению Твоему.

На ramo Спасе, заблудшее взял естество, вознесся, Богу и Отцу привел еси.

Слава, Господи, святому Вознесению Твоему.

Возшедый во плоти к безплотному Отцу, благословен Бог

отец наших.

*Слава:* Умерщвленное наше грехом естество взем, Твоему свойственному Отцу, Спасе, привел еси.

*И ныне:* От Девы рождся, Юже Богородицу соделал еси, благословен Бог отец наших.

## Песнь 8

*Ирмос:* Из Отца прежде век рожденного Сына, и Бога, и в последняя лета воплощенного от Девы Матере, священницы пойте, людие превозносите во вся веки.

Слава, Господи, святому Вознесению Твоему.

Во двою существу возлетевшаго Жизнодавца Христа на небеса со славою, и Отцу соседящаго, священницы пойте, людие превозносите во вся веки (*Дважды*).

Слава, Господи, святому Вознесению Твоему.

От работы идольския тварь избавившаго, и представившаго ту свободную Твоему Отцу, Тебе, Спасе, поем, и Тебе превозносим во вся веки.

*Слава:* Своим схождением низложившаго супостата, и Своим возшествием вознесшаго человеки, священницы пойте, людие превозносите во вся веки.

*И ныне:* Херувимов превысшая явилася еси, Богородице Чистая, во чреве Твоем сими Носимаго носившая: Егоже со безплотными, человецы славословим во вся веки.

## Песнь 9

*Ирмос:* Тя паче ума и словесе Матерь Божию, в лето Безлетнаго неизреченно рождшую, вернии единомудренно величаем.

Слава, Господи, святому Вознесению Твоему.

Тебе, Избавителя мира Христа Бога, апостоли видяще Божественно возвышаема, со страхом играюще величаху.

Слава, Господи, святому Вознесению Твоему.

Твою обожившуюся плоть зряще, Христе, на высоте Ангели друг ко другу глаголаху: воистинну Сей есть Бог наш.

Слава, Господи, святому Вознесению Твоему.

Тебе безплотных чинове, Христе Боже, на облацех вземлема видяще, взываху: славы Царю, врата возмите.

***Слава:*** Тебѣ сошѣдшаго да́же до послѣднихъ земли, и  
человѣка спасшаго, и восхождѣниемъ Твоимъ возвысившаго,  
Сего́ велича́емъ.

***И ныне:*** Радуйся, Богородице́ Ма́ти Христа́ Бо́га: Егѡ́же  
родила́ еси́, днесь отъ земли возноси́ма со апѡсто́лы зря́щи,  
возвелича́ла еси́.